



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Pili – Tarehe 10 Mei, 2018.

Kikao Kitaanza Saa 3.00 (Tatu) Asubuhi
na Dua itasomwa.

I. MASWALI:

Ofisi ya Makamu wa Pili wa Rais:

231. MHESHIMIWA OMAR SEIF ABEID (Jimbo la Konde) -
Atamuuliza Mheshimiwa Waziri wa Nchi, Ofisi ya Makamu
wa Pili wa Rais:

Katika mwaka wa fedha unaoishia June, 2018 Serikali ilipanga kutumia Tshs. 654.2 milioni kujenga uwezo kitaifa kwa ajili ya kuhimili athari za mabadiliko ya Tabia Nchi. Aidha Tsh. 1.7 bilioni zilikadiriwa kutumika kwa usimamizi wa mazingira, maliasili na mabadiliko ya Tabia ya Nchi yaliyotokana na tetemeko la ardhi chini ya bahari (Tsunami) lililotokea mwaka 2000, lililosababisha mabadiliko makubwa ya ardhi hasa maeneo ya kaskazini mwa Msuka kiasi ambacho bahari imekula eneo la karibu mita 200 na kuanza kusababisha hofu kubwa kwa wananchi.

- (a) Je, Serikali ina mpango gani wa kulihifadhi eneo la Kaskazini mwa vijiji vya Msuka kutokana na uvamizi huo wa bahari ambao umekuwa na athari kubwa kimazingira.

- (b) Je, Serikali inalifahamu tatizo hilo la uharibifu mkubwa wa kimazingira ambao unatokea kwa eneo hilo.
- (c) Je, kuna mpango gani kwa Serikali kutumia rasilimali kidogo zilizopo kushajihisha wananchi ili kuanza kudhibiti athari hizo.

Ofisi ya Rais, Tawala za Mikoa, Serikali za Mitaa na Idara Maalum za SMZ:

4. MHESHIMIWA SHEHE HAMAD MATTAR (Jimbo la Mgogoni) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Kwa kuwa JKU ni chombo cha Serikali ya Mapinduzi ya Zanzibar ambacho kimeundwa kwa ajili ya kuwafunza vijana wetu na pia kutoa mafunzo mbali mbali ya kujenga uchumi kupitia kilimo na viwanda. Lakini hadi sasa JKU Pemba bado hawajafikishiwa utaalumu wa viwanda ili nao waweze kujiendeleza wanapomaliza muda wao wa kukaa JKU.

- (a) Je, ni kwanini hadi leo Kikosi cha JKU Zanzibar hakijaanzisha mafunzo ya viwanda Kisiwani Pemba.
- (b) Je, ni lini JKU wataanzisha viwanda mbali mbali huko Pemba ili vijana walioko huko wafaidike na taaluma hiyo wakati wakiwepo kambini na hata pale wanapomaliza muda wao wa kuwa kambini.

33. MHESHIMIWA SAADA RAMADHAN MWENDWA (Nafasi za Wanawake) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Wananchi wa Jimbo la Chumbuni na majimbo jirani hasa wanawake wamekuwa wakipata shida sana kutokana na kutokuwa na soko katika eneo lao.

- (a) Kwa kuwa jimbo la Chumbuni lina wananchi zaidi ya 30,000 na kwa kuwa jimbo hilo bado lina maeneo ya

wazi, ni lini Serikali kupitia Manispaa ya Mjini itawajengea soko wananchi hao.

- (b) Ni vigezo gani vinavyotumiwa kufikia uamuzi wa kujenga soko katika maeneo ya kijamii.

Ofisi ya Rais, Katiba, Sheria, Utumishi wa Umma na Utawala Bora:

- 5. MHESHIMIWA SHEHE HAMAD MATTAR (Jimbo la Mgogoni) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Kwa kuwa wananchi wanaposhtakiwa ama huenda Mahakamani kwa ajili ya kusikilizwa kesi hadi kumalizika au kuwekwa ndani (rumande) kwa usalama wao au kwa upelelezi wa kesi.

Na kwa kuwa baadhi ya wakati mshtakiwa kuwekwa rumande kwa mwaka na baada ya kusomewa hukumu baadhi ya wakati mshtakiwa hufungwa au kuachiwa huru ama kufutiwa kesi kwa mujibu wa sheria.

- (a) Je, ni hatua gani za kisheria zinazostahiki kuchukuliwa na mwananchi ambaye amefutiwa kesi au kuachiwa huru baada ya kukaa rumande kwa muda wote huo.
- (b) Je, ni lini Serikali itaanza kutowa fidia au stahiki nyengine kwa mshtakiwa aliyekuwa rumande na kuachiwa baada ya kuonekana kuwa hana makosa na tayari ameshasumbuka na kudhalilika.

Wizara ya Kilimo, Maliasili, Mifugo na Uvuvi:

- 57. MHESHIMIWA MWANAIDI KASSIM MUSSA (Nafasi za Wanawake) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Tunaipongeza Serikali kwa juhudi wanazozichukua za kuanzisha maeneo tengefu ya uvuvi ambayo yameonesha mafanikio makubwa kwa uvuvi wetu.

- (a) Kwa nini 30% ya michango inayopatikana kutokana na maeneo hayo haiwafikii Wavuvi kama ilivyoelekezwa katika Kanuni ya 19(3)(b) ya Kanuni ya Uhifadhi wa Bahari.
- (b) Je, Serikali ina mpango gani wa kuanzisha maeneo mengine kama hayo katika vijiji vyetu vya Unguja na Pemba.

Wizara ya Biashara na Viwanda:

113. MHESHIMIWA HIDAYA ALI MAKAME (Nafasi za Wanawake) - Atamuuliza Mheshimiwa Waziri wa Biashara na Viwanda:

Zanzibar imebarikiwa sana kuwa na mazao ya biashara ambayo yana tija kubwa sana kama vile karafuu, pilipili hoho, nazi n.k. Hata hivyo, mkazo zaidi umewekwa katika zao la karafuu peke yake na mazao kama pili pili hoho ambazo kilo moja katika soko ni shiilingi 29,000/= mpaka 30,000/= hayapewi kipaumbele kama ilivyo karafuu. Aidha, wakulima wa zao hili la pilipili hoho hawatazamwi kwenye masoko na badala yake huwa wanapunjwa sana.

- (a) Je, Wizara itachukuwa hatua gani kulipa hadhi zao la pili pili hoho ambalo lina bei kubwa ili kuwezesha wakulima wake wajikombowe na umasikini.
- (b) Je, Wizara imefanya tathmini gani kwa mazao mengine ya biashara mbali na karafuu katika kuhakikisha yanaleta tija kwa wakulima na nchi kwa ujumla.
- (c) Je, mazao gani mengine ya biashara ambayo Wizara imeyawekea mkakati kama ule unaowekwa kwa zao la karafuu.

Wizara ya Habari, Utalii na Mambo ya Kale:

120. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Habari, Utalii na Mambo ya Kale:

Pamoja na jitihada za kukuza utalii zinazochukuliwa Zanzibar na hivyo kuongeza pato la taifa, bado jitihada hizo hazijafanyika kwa upande wa Pemba, za kuitangaza Pemba kiutalii na kuongeza pato la nchi.

- (a) Je, Serikali imejipanga vipi kufanya juhudi za makusudi za kuitangaza Pemba kiutalii.
- (b) Ni vipaumbele gani vya utalii vilivyopo Pemba ambavyo utalii utaanza navyo.

Wizara ya Ardhi, Nyumba, Maji na Nishati:

27. MHESHIMIWA MUSSA FOUM MUSSA (Jimbo la Kiwani) - Atamuuliza Mheshimiwa Waziri wa Ardhi, Nyumba, Maji, na Nishati:

Nyumba ya maendeleo iliyopo Kengeja imekuwa mbovu sana, miundombinu yake yote hivi sasa haifanyikazi vizuri na hata hairidhishi hivi sasa kwa kuishi watu.

- (a) Je, Waziri hili unalifahamu.
- (b) Je, Wizara ina mpango gani wa dharura ili kuhami nyumba hiyo.

Wizara ya Afya:

45. MHESHIMIWA OMAR SEIF ABEID (Jimbo la Konde) -
Atamuuliza Mheshimiwa Waziri wa Afya:

Kwa kuwa Serikali yetu iliongeza kiwango cha Bajeti ya Wizara ya Afya kutoka Tshs. 44.2 billioni kwa mwaka wa fedha 2016/2017 hadi kufikia Tshs. 58.7 billioni kwa mwaka 2017/2018 pamoja na kupatiwa ruhusa ya kuajiri wafanyakazi ambao watapunguza upungufu wa wafanyakazi kwenye maeneo mbali mbali Unguja na Pemba hasa madaktari na wafamasia.

- (a) Je, hadi sasa ni wafanyakazi wangapi wanya waliokwishaajiriwa hadi kufikia Disemba, 2017.
- (b) Je, kutokana na ongezeko hili la bajeti na ajira kwa wafanyakazi, Wizara ina mpango gani wa kupeleka wafanyakazi wa ngazi za Mganga Msaidizi kwenye vituo vya Msuka, Kiuyu Kipangani na Mkia Ng'ombe ambavyo havina wafanyakazi pamoja na kwamba zipo nyumba za kuishi za wafanyakazi hao.
- (c) Je, kwa nafasi za ajira ambazo Wizara imeshaajiri hadi sasa imepeleka wafanyakazi wangapi Pemba.

Wizara ya Ujenzi, Mawasiliano na Usafirishaji:

41. MHESHIMIWA SAID OMAR SAID (Jimbo la Wingwi) -
Atamuuliza Mheshimiwa Waziri wa Ujenzi, Mawasiliano na Usafirishaji:

Maendeleo ya haraka ya mawasiliano yameleta faida kubwa kwa watumiaji na wananchi kwa huduma, kama kutuma na kupokea fedha na kufanya malipo ya huduma na bidhaa na kutumia mtandao wa "internet" kupitia simu ya mkononi. Hata hivyo, wapo wachache wanaotumia vibaya kama vile kufanya uhalifu.

Je, ni wahalifu wangapi waliotiwa hatiani kwa wizi wa kutumia mtandao Unguja na Pemba.

II. HOJA ZA SERIKALI:

Waziri wa Nchi, Ofisi ya Makamu wa Pili wa Rais:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Ofisi ya Makamu wa Pili wa Rais kwa mwaka 2018/2019.

Zanzibar,
10 Mei, 2018.

(Raya Issa Msellem)
KATIBU WA BARAZA.